

LOTU BILONG ISTA NAIT

I. RIT (longpela Rit)

Jen 1:1-2:2

Akar dapanim: God bizibar gari da derazi, a bar akonge.

Akar kam, a Faraghaviram Otivizir Bizibar Akinafarim, o Jenesis, an aven iti.

Bar faraghavira God overiam ko nguazimin ingarigha aning itir biziba bar dagh amizima, da otifi. Faragha zuir dughiar kam, nguazim e datirighin iti moghin garir pu. Puvati. A bar pura ikia egha an ganganim ighara. Mitater dafam ongarir ekiaba avarazima, Godin Duam pura dipam gisin arui.

Ezi God kamaghin migei, “Angazangarim otogh.” Ezi angazangarim oto. Ezi God angazangarimin gari, a derazima, a bar akonge. Egha mitatem ko angazangarim tuiara. Egha angazangarim ziar kam, “Aruem” a gati. Egha mitatem ziar kam, “Dimagarim” a gati. Ezi aminim pirigha ua tirazima, kar dughiar bar faraghavira zuim.

Egha gin God kamaghin migei, “Avavetam otogh dipam avinighti, dipam akuar pumuningin iki.” Ezi avaver kam oto. God avaver kam gamizima, a dipar pin itim ko apengan itim abiki. Ezi an avaver kam ziam, “Overiam” a gati. Ezi aminim pirigha ua tirazima, kar dughiar namba 2.

Egha gin God kamaghin migei, “Dipar overiamin apengan itim sivagh mangi danganir vamiran uabi akufagh, eghti nguazir misingizim otogh.” Ezi nguazir misingizim oto. Ezi God nguazir misingizir kam ziam, “Nguazim” a gati. Egha dipar danganir igharazimin uabi akuvaziba, a ziam, “Ongariba” a gati. Egha God bizir kabar gari da bar derazima, a bar akonge. Egha gin God kamaghin migei, “Nguazim, temer guar aviriba ko nguazimin aver beniba ko dagheba a gisin aghung.” Ezi bizir kaba otifi. Ezi temer ber guar aviriba ko benir nguazimin aveba ko dagher apiba

bar nguazimin vaghvagha me aghui moghin aghua egha be moghin be. Ezi God bizir kabar garima da derazima, a bar akonge. Ezi aminim pirigha ua tirazima, kar dughiar namba 3.

Egha gin God kamaghin migei, “Angazangariba overiamin otifigh, egh aruem ko dimagarim abikigh. Eghti dughiaaba ko azeniba ikiti, me angazangarir kabar ganiva dughiabagh fogham. Eghti angazangarir kaba otivigh angazangarim nguazim daningam.” Ezi angazangariba otifi. Egha God angazangarir ekiar pumuning gamizima aning oto. Angazangarir ekiam, an aruem, egha isiragha gara aruemin angazangarim anidi. Ezi dozim, a iakinim, a isiragha dimagarimin angazangarim anidi. Egha God mikovezibagh amizi da otifi. Egha God nguazim angazangarim a daningasa, angazangarir kaba overiamin ada ariki. Egha aruem isiragh ganamin dughiam atigha, egha uaghan dimagarim otivamin dughiam ati, eghti aruem ko dimagarim deravira uaning abigham. Ezi God bizir kabar gari da derazima, a bar akonge. Ezi aminim pirigha ua tirazima, kar dughiar namba 4.

Egha gin God kamaghin migei, “Ongarimin aven, bizir angamra itir aviriba an ikiva a gizivagham. Eghti kuaraziba otivigh overiamin pin tintinibar mighi.” Ezi God ongarimin osirir dafaba ko kuruzir dafabar ingarizi da otifi, ongarimin itir bizir guar aviriba, ko kuarazir guar aviriba uakan, da vaghvagha gari moghira gari. Ezi God bizir kabar gari da derazima, a bar akonge. Egha bizir kaba deraghasa,

God migirigiar aghuir kam dagh ami, “Ia ongarimin itir bizir guar aviriba, ia avirasemegh, ongarim bar a gizifagh. Eghti ia kuaraziba, ia nguazimin bar avirasemegh.” Ezi aminim pirigha ua tirazima kar dughiar namba 5.

Egha gin God kamaghin migei, “Nguazim bizir angamra itir guar aviribar amuti da vaghvagha gari moghira an otiv. Egh nguibamin itir asiziba ko, ruarimin itir asizir ekiaba ko doziba sara damuti da otiv.” Ezi asiziba otifi. God nguibamin asizir guar aviriba ko ruarimin asizir ekiaba ko dozibar ingarizi, da vaghvagha gari moghira otifi. Ezi God bizir kabar gari da derazima, a bar akonge.

Egha God kamagh migia ghaze, “Datirighin e gumaziba ko amizibar ingarighti me en mirara ganam. Egh e me atighti, me en min iki, ongarimin itir osiriba ko, overiamin itir kuaraziba ko, asizir guar aviriba ko nguazimin itir biziba bar, me dar gan dagh ativagham.” Egha God gumazamiziba ingarizi, me Godin mirara gari. God me gamizima, me an nedazimin min oto. A me gamizima, men marazi gumazibar min otivizi marazi amizibar min otifi.

O:

1. RIT (sotpela rut)

Jen 1:1, 26-31

Akar dapanim: God bizibar gari da derazi, a bar akonge.

Akar kam, a Faraghaviram Otivizir Bizibar Akinafarim, o Jenesis, an aven iti.

Bar faraghavira God overiam ko nguazimin ingarigha aning itir biziba bar dagh amizima, da otifi.

Egha God kamagh migia ghaze, “Datirighin e gumaziba ko amizibar ingarighti me en mirara ganam. Egh e me atighti, me en min iki, ongarimin itir osiriba ko, overiamin itir kuaraziba ko, asizir guar aviriba ko nguazimin itir biziba bar, me dar gan dagh ativagham.” Egha God gumazamiziba ingarizi, me Godin mirara gari. God me gamizima, me an nedazimin min oto. A

Ezi God me deraghasa, migirigiar aghuim me gamua kamaghin migei, “Ia avirasemegh egh mangi nguazir oteyiba bar dar apiagh egh bizir nguazimin itiba bar dar gan. Ki osiriba ko, kuaraziba ko, nguazimin itir asizir guar aviriba ian dafarim darigham.” Egha God migia ghaze, “Ki nguazir kamin itir dagheba batamin temeba, ko nguazimin aven otivir dagher aviriba, ki bar da ia ganidi. Eghti ia bizir kabar dagheba iniam. Egha ter afarir gariba daghebar min, ki da isa angamra itir asiziba bar, dagh anidi, eghti da dar amam. Kar, nguibamin itir asiziba ko ruarimin itir asizir ekiaba ko doziba ko, overiamin itir kuaraziba bar.” Ezi bizir kaba God mikemezi moghirama otifi. Ezi God bizir kaba bar adar gari da bar derazima, a bar akonge. Ezi aminim pirigha ua tirazima, kar dughiar namba 6.

Ezi arazir kamra, God overiam ko nguazim ko aningin itir bizir aviribar ingari. Ezi dughiar namba 7in God uan ingangaribar gari da gifa, ezi a dughiar kamin avughsi.

Kar Godin Akam.

me gamizima, men marazi gumazibar min otivizi marazi amizibar min otifi. Ezi God me deraghasa, migirigiar aghuim me gamua kamaghin migei, “Ia avirasemegh egh mangi nguazir oteyiba bar dar apiagh egh bizir nguazimin itiba bar dar gan. Ki osiriba ko, kuaraziba ko, nguazimin itir asizir guar aviriba ian dafarim darigham.” Egha God migia ghaze, “Ki nguazir kamin itir dagheba batamin temeba, ko nguazimin aven otivir dagher aviriba, ki bar da ia ganidi. Eghti ia bizir kabar

dagheba iniam. Egha ter afarir gariba
daghebar min, ki da isa angamra itir
asiziba bar, dagh anidi, eghti da dar
amam. Kar, nguibamin itir asiziba ko
ruarimin itir asizir ekiaba ko doziba ko,
overiamin itir kuaraziba bar.” Ezi bizir

kaba God mikemezi moghirama otifi.
Ezi God bizir kaba bar adar gari da bar
derazima, a bar akonge. Ezi aminim
pirigha ua tirazima, kar dughiar namba
6.

Kar Godin Akam.

SAM

Sam 104:1-2, 5-6, 10, 12-14, 24, 35

Ia akam ikaragh: Ekiam, nin Duam nguazir kam gamizi, an igiam oto.

Ki uan navir averiamin aven Ikiavira Itir Godin ziam fam!

O Ikiavira Itir God, nan God, ni bar pin iti.

Nin ziam bar pin ikia egha ni atrivir bar ekiam.

Angazangarim ni evara, mati gumazim nim avara.

Ni overiam atizima mikoveziba bar iti, mati gumazim purirpenim asaragha
benimin a ikezima a iti.

Ia akam ikaragh: Ekiam, nin Duam nguazir kam gamizi, an igiam oto.

Ni fomira nguazir kam atizi a bar deraghavirama aperagha gavgafi.

Egha bar mozorozir puvati.

Ni ongarim atizi a ikia nimin min nguazim avara.

Ezi dipar kam mighsiaba bar ada avara.

Ia akam ikaragh: Ekiam, nin Duam nguazir kam gamizi, an igiam oto.

Ni nguazimin aven ivemarir dipabagh amima,

da nguazir averiamin otivigha danganir zaribar afora,

egha mighsiabar tongin ivemara uaghiri. Overiamin pin mighagha aruir
kuaraziba iza,

temer dipamin miriamin tuivighav itibar uan mikonibar ingari.

egha temebar aguabar apiaghirava arai.

Ia akam ikaragh: Ekiam, nin Duam nguazir kam gamizi, an igiam oto.

Ni uan Nguibamin ikia egha amozim amadi, a mighsiabagh isin izi.

Ni ingangarir aghuim gamua nguazir kamin akura, ezi nguazir kam, bizir

aghuiba bar a gizifa. Ni bulmakauba apir dadabagh ami da otifi,

Ezi e gumazamiziba oparir biziba, ni uaghan dagh amizi da otivizi,

e dar dagheba isi.

Ia akam ikaragh: Ekiam, nin Duam nguazir kam gamizi, an igiam oto.

O Ikiavira Itir God, ni bizir bar avirimin ingari!

Ni bar fofozir ekiam ikia bizir avirir kaba bar adar ingari.

Ezi bizir ni ingarizir kaba, nguazim bar a gizifa. Nan ifongiam kamakin,

ni arazir kurabagh amir gumazamiziba bar me gasighasikigh.

Gumazir kuraba bar moghira gevegh ua ikian kogham.

Ki uan navir averiamin aven Ikiavira Itir Godin iziam fam!

Ia akam ikaragh: Ekiam, nin Duam nguazir kam gamizi, an igiam oto.

O:

NARAPELA SAM Sam

33:4-7, 12-13, 20, 22

Ia akam ikaragh: Ekiamin ifongiam, a nguazir kam bar anevara

E fo, Ikiavira Itir Godin akam, a guizbangira iti.

Ezi a uan akam mikemezi moghira zurara guizin arazibar gin ghua ingangariba bar dagh ami.

Ikiavira Itir God, en arazir aghuiba ko guizin araziba, a bar dagh ifonge.

An apangkuvir arazim, nguazimin itir gumamaziziba, bar me ave.

Ia akam ikaragh: Ekiamin ifongiam, a nguazir kam bar anevara

Ikiavira Itir God fomira mikemezi, aruem ko iakinim, ko mikoveziba, ko overiamin pin itir biziba bar, da otivigha iti.

Gumazim dipam isa itam guruizi moghin, an ongarim isa danganir vamiran anakufa.

Egha ongarim gamizi a konegha bar nguazimin apengan tir danganimin vin mar iraghu.

Ia akam ikaragh: Ekiamin ifongiam, a nguazir kam bar anevara

Kantrin tam God baghavira ikiti, Ikiavira Itir God deravira a damuti, a bar akongegh.

Kantrin kam, an gumamaziziba, God ua baghavira me ginaba.

Ikiavira Itir God, uan Nguibamin ikia,

nguazimin gumamaziziba deragha men gari.

Ia akam ikaragh: Ekiamin ifongiam, a nguazir kam bar anevara

E Ikiavira Itir God baghivira mizuamiva, nighnizir gavgavim an ikiti an e geghuvam.

A en oramin min itima e an aven modima a en akurvasi. O Ikiavira Itir God, e nighnizir gavgavim nin ikiavira ikia nin akurvazim mizuai.

Kamaghin, ni en apangkuvigh mamaghira iki.

Ia akam ikaragh: Ekiamin ifongiam, a nguazir kam bar anevara

2. RIT (longpela Rit)

Jen 22:1-18

Akar dapanim: Abrahamin ofa, a en nighnizir gavgavimin afeziam.

Akar kam, a Faraghaviram Otivizir Bizibar Akinafarim, o Jenesis, an aven iti.

Egha gin dughiar mam God Abrahamin nighnizir gavgavim gifoghasa a guizbangira gavgaviz, ti puvati? Kamaghin an an diagha egha ghaze, "Abraham!"

Ezi Abraham ghaze, "Ki kati."

Ezi God a migia ghaze, "Ni otarir vamira iti Aisak, ezi ni bar a gifonge. Ni borir kam inigh egh Morian nguazimin

aningti ki mighsiatam nin akagham.

Egh mighsiar kamin ni Aisak isi avim bar isizir ofan min na daningigh."

Egha bar mizaraghara Abraham donki inigha Aisak ko uan ingangarir gumazir pumuning ini. Egha ofa damuasa dazibar kuegha danganir God a mikemezimin zui. Egha namba 3in aruemin Abraham danganir kamin

gari a saghon ikiavira iti Ezi a kamagh ingangarir gumazimning migei, "Gua donki ko kagh iki. Ki borim ko mangi ga munagh Godin ziam fam. Egh ga gin gua bagh uamategham."

Egha Abraham dazir ofa damuamiba Aisak ganingizi ana dagh isaghpu. Ezi Abraham sabam ko avim suiragha, aning zui. Aning tighar maghin ghua Aisak kamaghin an azara, "Afeziam."

Ezi Abraham ghaze, "Nan borim, manmaghin ami?"

Ezi Aisak an azara, "Afeziam, ki gari daziba ko avir ofa damuamim iti, ezi sipsipin ofa damuamim mana?"

Ezi Abraham a ikaragha ghaze, "Nan borim, God uabi ofa damuamin sipsipin nguzim, ga daningam." Egha aning zui.

Egha aning danganir God mikemezimin otogha givagha, Abraham ofa gamir dakozimin ingarigha daziba a gisin da ariki. Egha uan otarim Aisak benimin a ike. Egha a isa ofa gamir dakozimin dazibagh isin aneti. Egha Abraham sabam inigha borim aghorasava ami.

Ezi Ikiavira Itir Godin ensel, a Godin Nguibamin ikia diagha ghaze, "Abraham! Abraham!"

Ezi Abraham a ikaragha ghaze, "Ki kati."

Ezi ensel a migia ghaze, "Ni uan borim misueghti an aremeghan marki.

Egh arazitamin a damuan marki.

Ni bar borir vamira ikia egha an anogoroghezir puvati. Ni a isi God daningasaviram ami. Kamaghin ki fo, ni gumazir Godin atiatiava an apengan itim."

Ezi Abraham kogha sipsipin apurir mamin gari, an kom tevsevir mamin suirazima a iti. Ezi a ghua sipsipin kam inigha, a misuegha a isa bar isizir ofa damuasa a gaboro. Sipsipin apurir kam Aisakin danganim inizi Aisak iti. Ezi Abraham danganir kam ziar kam, "Ikiavira Itir God Aningi" a gati. Ezi iza datirighin gumaziba ghaze, "Ikiavira Itir Godin uan mighsiam gisin biziba e daningam."

Ezi Ikiavira Itir Godin ensel Abraham uam an diagha a migia ghaze, "Ki Ikiavira Itir God, guizbangira uabi uan ziamin kamaghin migia ghaze, ni bar borir kamra ikia, egha an anogoroghezir puvati. Kamaghin ki bar deraghvira ni damuam. Egh ki nin ovavir boribar amighti me bar avirasemegh mikoveziba ko gigimin min otivigham. Eghti nin ovavir boriba uan apaniba abinigh, egh men nguibaba iniam. Guizbangira, ni nan akam baregha an gin ghu, kamaghin amizi, nin ovavir boriba bangin ki nguazir kamin itir nguibaba bar deravira me damuam."

Kar Godin Akam.

O:

2. RIT (sotpela Rit)

Jen 22:1-2, 9-13, 15-18

Akar dapanim: Abrahamin ofa, a en nighnizir gavgavimin afeziam.

Akar kam, a Faraghaviram Otivizir Bizibar Akinafarim, o Jenesis, an aven iti.

Egha gin dughiar mam God Abrahamin nighnizir gavgavim gifoghasa a guizbangira gavgaviz, ti puvati? Kamaghin an an diagha egha ghaze, "Abraham!"

Ezi Abraham ghaze, "Ki kati."

Ezi God a migia ghaze, "Ni otarir vamira iti Aisak, ezi ni bar a gifonge. Ni borir kam inigh egh Morian nguazimin aningti ki mighsiatam nin akagham. Egh mighsiar kamin ni Aisak isi avim bar isizir ofan min na daningigh."

Egha aning danganir God
mikemezimin otogha givagha, Abraham
ofa gamir dakozimin ingarigha daziba
a gisin da ariki. Egha uan otarim
Aisak benimin a ike. Egha a isa ofa
gamir dakozimin dazibagh isin aneti.
Egha Abraham sabam inigha borim
aghorasava ami.

Ezi Ikiavira Itir Godin ensel, a
Godin Nguibamin ikia diagha ghaze,
“Abraham! Abraham!”

Ezi Abraham a ikaragha ghaze, “Ki
kati.”

Ezi ensel a migia ghaze, “Ni uan
borim misueghti an aremeghan marki.
Egh arazitamin a damuan marki.
Ni bar borir vamira ikia egha an
anogoroghezir puvati. Ni a isi God
daningasaviram ami. Kamaghin ki fo, ni
gumazir Godin atiatiaa an apengan
itim.”

Ezi Abraham kogha sipsipin apurir
mamin gari, an kom tevsevir mamin

suirazima a iti. Ezi a ghua sipsipin kam
inigha, a misuegha a isa bar isizir ofa
damuasa a gaboro. Sipsipin apurir kam
Aisakin danganim inizi Aisak iti.

Ezi Ikiavira Itir Godin ensel
Abraham uam an diagha a migia ghaze,
“Ki Ikiavira Itir God, guizbangira uabi
uan ziamin kamaghin migia ghaze,
ni bar borir kamra ikia, egha an
anogoroghezir puvati. Kamaghin ki
bar deraghvira ni damuam. Egh ki
nin ovavir boribar amighti me bar
avirasemegh mikoveziba ko gigimin
min otivigham. Eghti nin ovavir boriba
uan apaniba abinigh, egh men nguibaba
iniam. Guizbangira, ni nan akam
baregha an gin ghu, kamaghin amizi,
nin ovavir boriba bangin ki nguazir
kamin itir nguibaba bar deravira me
damuam.”

Kar Godin Akam.

SAM

Sam 16:5, 8, 9-11

Ia akam ikaragh: O God, ni zurara na geghufi, ezi ki ni bagha ivegha izi.

Ikiavira Itir God, nirara nana, ua bizir igharaziba puvati.

Ni bizir ki oteveziba, ni da na ganidi.

Ezi nan ikirimirim nin dafarimin iti. Ki fo, Ikiavira Itir God zurara bar nan
boroghira iti.

A bar roghira ikia gavgavim na ganidima, ki atiatiaa agoir puvati.

Ia akam ikaragh: O God, ni zurara na geghufi, ezi ki ni bagha ivegha izi.

Kamaghin, nan navir averiam bar akonge.

Ezi nan duam a bar akonge.

Ezi nan mikarzim bizitam bar an atiatir puvati. Ki fo, ni na ateghti ki gumaziba
ovia ghua itir danganimin magiran kogham.

Ni uan gumazir ni ua baghavira inabazim ateghti,
a mozir konimin iki kurighan kogham.

Ia akam ikaragh: O God, ni zurara na geghufi, ezi ki ni bagha ivegha izi.

Ni uabi, ikirimirim aghuarim iniamin tuavim, nan akagha gifa.

Ki nin damazimin ikiti, nan navir averiam agorogem bar a gizivagham.

Ki nin boroghira iki zurara bar akueghvira ikiam.

Ia akam ikaragh: O God, ni zurara na geghufi, ezi ki ni bagha ivegha izi.

3. RIT

Eks 14:15-15:1

Akar dapanim: Aminim iva ongarim tivazi abigha akuar pumuningin oto. Ezi aningîn tongîn itir nguazim a misingi, ezi Israelia ghua ongarimin vongîn ghue.

Akar kam, a Ua Me Inimin Akinafarim, o Eksodas, an aven iti.

Ikiavira Itir God, kamagh Moses migei, “Ni tizim bagha nan ingarava aravira iti? Ni Israelia mikemeghti, me mangi. Eghti ni uan asadivir aghorim ghufegh, ongarim gisin amadagh. Eghti ongarim bigh akuar pumuning irighi, Israelia nguazir dakirtizimin mangi vongîn otifigh. Eghti ki Isipia damighi men naviba gavgavighi, me ian gin ongarim biaghirizir tuavimin mangam. Eghti ki atrivim ko, an karisba ko, midorozir gumazir hoziabagh apiaziba, ko midorozir gumaziba bar me dikabiragham. Egh ki me gamizir arazir kam bagh, ziar ekiam iniam. Ki Isipia dikabiragham me abiraghti me fogh suam, Kirara, ki Ikiavira Itir God.”

Ezi Godin enselin zurara Israelian midorozir gumazibar faragha zuim, a sivagha ghua men akirangin tu. Ezi ghuariar ruarir ekia zurara men faragha zuim, a uaghan isivagha ghua men akiraghin tu. Dimagarir kamin, ghuariar ruarir ekia kam Israelia ko, Isipian tizimin tughav iti. Ghuariar ruarir kam Isipia itir danganim gamizi, a bar mitatangi. Egha Israelia itir danganim angazangarim a ganingi. Kamaghin, dimagarir kamin Isipia ko Israelia uarir boroghin mangan ibura.

Moses uan agharim ghufegha, ongarim gisin anemada. Ezi dimagarimin Ikiavira Itir God, aminir gavgavim gamizi, an aruem anadi naghin oto. Egha dimagarir kamin aminim ongarim giva ghuavti aminim tira. Ezi ongarim tongira biaghirigha, akuar pumuningin irigha nguazir dakirtizimin oto. Egha divazimningin min vong ko vongin akuvagha itima, Israelia aningîn tongin nguazir dakirtizimin ghua vongin otifi. Ezi

Isipin midorozir gumaziba Israelian agiragha, men gin ghua ongarimin tongira ghu. Men hoziaba ko, karisba ko, gumazir hoziabagh apiziba, da bar zui. Ezi Ikiavira Itir God, aviv zariamîn min ghuariar ruarir kamin aven iti. Ezi aminim tiasa amima, a Isipian midorozir gumaziba, men nighnizibagh irazima, me tintinibar nighnigha atiatia arasava ami. Ikiavira Itir God, karisbagh amizi, nguazim dar wilbar suighizi, da pamten ivemarir puvati. Ezi Isipia uarira uariv gei, “Ia oragh, E zuamirama ari mangeka! Ikiavira Itir God, Israelian akuragha e misosi.”

Ezi Ikiavira Itir God, kamagh Moses migei, “Ni uan agharim ghufegh, ongarim gisin anemadaghti, dipam ua izi Isipian midorozir gumaziba, ko men karisba ko gumazir hoziabagh apiaziba, bar me avaragh.”

Ezi Moses agharim ghufegha ongarim gisin anemada. Aminim tirazima, ongarim ua iza faragha ikezi moghon uan danganimin iti. Dughiar kamra, Isipia ari mangasa amuvira itima, Ikiavira Itir God, bar me avigha ongarim mikini. Ezi ongarim uamategha ize. Egha gumazir atrivimin hoziabagh apiaziba ko, midorozir gumazir Israelian gin ongarir torimin ghueziba, bar me avara. Ezi men tav miseviaghirizir puvati. Ongarim divazim min, vong ko vongin akuvagha itima, Israelia nguazir dakirtizimin zui.

Dughiar kamin, Ikiavira Itir God, Isipian dafarimin Israelia, ua men akura. Ezi Israelia, Isipian kuabar garima, da ongarir dadarimin ireghav iti. Israelian gumazamiziba garima, Ikiavira Itir God, uan gavgavir ekiamin

pamtem ingara, Isipia dikabiragha me abira. Ezi me bar atiatigha, Ikiavira Itir God, nighnizir gavgavim an iti. Egha an ingangarir gumazim Moses, me uaghan nighnizir gavgavim an iti.

Dughiar kam Moses Israelian gumazamiziba ko, Ikiavira Itir God bagha ighiar kam kamaghin a bange.

“Ikiavira Itir God, a midorozir ekiam abira, ezi ki datirighin a bagh onger akam bangam.

Guizbangira, a hoziaba ko gumazir hoziabagh isin apiaziba me avigha ongarim mikini. An apaniba abira, ezi an ziam bar pin iti!”

Kar Godin Akam.

SAM

Eks 15:1-6, 17-18

Ia akam ikaragh: E Ekiam bagha ighiam banga ghaze, a midorozim gafiragha iziar ekiam ini.

Dughiar kam Moses Israelian gumazamiziba ko, Ikiavira Itir God bagha ighiar kam kamaghin a bange.

“Ikiavira Itir God, a midorozir ekiam abira, ezi ki datirighin a bagh onger akam bangam.

Guizbangira, a hoziaba ko gumazir hoziabagh isin apiaziba me avigha ongarim mikini.

An apaniba abira, ezi an ziam bar pin iti!”

Ikiavira Itir God uabi na gamizima, ki gavgavigha, onger akam bangava an ziam fe.

A zurara ua na isi, ezi ki an ziam fasa.

A nan God, egha nan akurvazim. kamaghin, ki an ziar ekiam fasa.

Nan afeziamin God, ki an ziar ekiam fi, a isi bar pin anerigh ighiam damuam.

Ia akam ikaragh: E Ekiam bagha ighiam banga ghaze, a midorozim gafiragha iziar ekiam ini.

Ikiavira Itir God, a bar midorozir gumazir gavgavim.

Ziar kam, Ikiavira Itir God, kar an ziam.

A Isipian midorozir gumaziba ko men karisin midorozim gamiba, a me avigha me isa ongarim mikini.

Ezi men midorozir gumazir dapaniba, ongarim amegha Ongarir Aghevimin aven ariaghire.

Ia akam ikaragh: E Ekiam bagha ighiam banga ghaze, a midorozim gafiragha iziar ekiam ini.

Ongarim bar me avarazima,

me dagiabar min ongarir dikinim giraghue.

Ikiavira Itir God, nin agharir guvim bar gavgavir ekiam iti,

ni uan apaniba dikaragha bar me mirmiri.

Ia akam ikaragh: E Ekiam bagha ighiam banga ghaze, a midorozim gafiragha iziar ekiam ini.

O Ikiavira Itir God, ni en aku mangiti, e nin mighsiamin deraghvira dapiagham.
O Ekiam, danganir kamin, ni uabi uan dipenimin ingaram.
Dipenir ni itir kamin, gumazamiziba izi nin ziam fam.
Ikiavira Itir God, an atrivimin min iki mamaghira ikiam.”

Ia akam ikaragh: E Ekiam bagha ighiam banga ghaze, a midorozim gafiragha iziar ekiam ini.

4. RIT

Ais 54:5-14

Akar dapanim: Dughiaba bar ki nin apangkuvigh ni gifuegh deragh ni damuam.

Akar kam, Godin akam inigha izir gumazim Aisaia, an osiri.

Egha God kamaghin migei, “Gumazir nin ingarizim, a nin pamin min iti.
Kar an ziam, Ikiavira Itir Godin Bar Gavgaviba Itim,
a Israelian Godin Bar Zuezim,
a nin Akurvazir Gumazim,
a nguaziba bar dagh ativagha dar garir God.
Guizbangira Ikiavira Itir God ghaze, ki nin diaghti ni uam na bagh izam.
Ni mati amizir igiam uan pamin ikia, gin an anetaghizi an navim bigha bar
oseme.
Kamaghin amizi, ki ghaze, ni ua izi.

Ki Ikiavira Itir God, nin Akurvazir Gumazim, ki ghaze,
ki dughiar bar otevimin ni ategha, datirighin ki apangkuvir ekiam nin iti.
Kamaghin amizi, ki ua ni inigh izam.
Ki dughiar otevimin bar puvira nin atara, uan guam modo.
Ki datirighin nin apangkuv ni gifuegh,
egh zurara deraghvira ni damuam.

Ki Noan dughiamin kamaghin akam akira ghaze,
ki nguazim gasighasighsi uam aperiam damighti an otivan kogham.
Kamaghira, ki guizbangira ni migia ghaze,
ki ua nin aningaghegh, ni batueghan kogham.
Ki Ikiavira Itir Godin bar ia gifongezim, ki ghaze, mighsiaba ko akiriba ti
sivaghsivagh mangam,
eghti nan apangkuvir arazir ian itim, a gavgavigh iki mamaghira ikiam.
Ki fomira e uari inigh deragh ikiasa, ia ko Akar Dikirizir Gavgavim, a gamigha
gifa. Eghti ki Akar Gavgavir Dikirizir kam, an anebigham kogham.”

Egha Ikiavira Itir God ghaze,
“O Jerusalem nguibam, noki, gumazitam nin apangkuvir puvati,
egha osimtizir aviriba ni garigha ni apirizi ni iri.
Eghti ki dagiar bar aghuiba inigh ua nin ingarigham,
eghti ni ua nguibar bar aghuimin otogham.
Ki dagiar aghuir ivezim bar pin koziba inigh, egh nguazimin dar afegh adagh isin
ni afagham.
Egh ki dagiar guar igharagha gara taghtazir aghuiba inigh, ni bagh tiar akabar
ingarigh,
divazir gavgavim ni gighuigh an ingarigh,
divazimin tiar akabar ingarigham.

Egh uaghan divazim gisin, a nguibamin ganamin gumazibar dipenir bar pin
itibar ingarigham.
Ki Ikiavira Itir God, ki uabi nin boriba bar, men sure damuam,
eghti me dabirabir bar aghuimin ikiam.
Ki uan arazir aghuimin gin mangi ni damighti, ni gavgavigham.
Eghti gumazir ni dikabinamin tam ua nin boroghin ikian kogham.
Eghti ni bizitam uam an atiatingan kogham.
Atiatir arazim nin saghon ikiam.”

Kar Godin Akam.

SAM

Sam 30:2, 4, 5-6, 11-13

Ia akam ikaragh: Ekiam ua na ini, kamaghin amizi, ki a bagha ighiaba bange.

O Ikiavira Itir God, nan osimtiziba na abirazi ni ua na fegha anabogha nan akura.
Egha nan apaniba ataghizi me na dipovezir puvati.
Kamaghin, ki bizir kam bagha bar akuegha nin ziam fe. O Ikiavira Itir God, ki
atam aremeghai, ezi ni na gamizi, ki ua dikafi.
Ki gumaziba ariaghira ghua itir nguibamin ghugha gifa.
Ezi ni, ikirimirir ki itir kam ua na ganingi.

Ia akam ikaragh: Ekiam ua na ini, kamaghin amizi, ki a bagha ighiaba bange.

Ia Ikiavira Itir Godin gumazamiziba, ia a bagh onger akabar amu an ziar bar
zuezim fi.
Egh bizir an amizibagh nighnigh a minabi.
Guizbangira, a en atarir adariba, da dughiar otevimra iti.
Ezi dughiar e nguazir kamin itimin, a uan navim sara e gifongegha deragha e
gami.
E, dimangan temeriba ireghiva, amimzaraghan deragh iki bar akuegham.

Ia akam ikaragh: Ekiam ua na ini, kamaghin amizi, ki a bagha ighiaba bange.

O Ikiavira Itir God, ni na baregh nan apangkufigh.
O Ikiavira Itir God, ni nan Akurvazir Gumazimin iki!
Ni nan navir osimtizim batoke, ezi ki bar akuegha onger akabagh ami.
Ki faragha azir korotiaba aghui,
ezi datirighin ni nan azir korotiam sueghava, nan ararem oteghavkinizi nan
navim derazi ki bar akonge.
Ikiavira Itir God, ki uan akam dukuaghan kogham.
Ki uan navir averiamin onger akabar amu egh nin ziam fam.
Egh zurara ni minabivira ikiam.

Ia akam ikaragh: Ekiam ua na ini, kamaghin amizi, ki a bagha ighiaba bange.

5. RIT

Ais 55:1-11

Akar dapanim: Ia na bagh iziti ia deraghvira ikiam. Eghti ki Akar Gavgavir Dikirizim ia ko damuti, a iki mamaghira ikiam.

Akar kam, Godin akam inigha izir gumazim Aisaia, an osiri.

Ikiavira Itir God kamaghin migei,
“O gumazamizir dipam bagha
kuariba piriba,
ia na bagh izi dipabar ami.
Ia gumazir dagiaba puvatiziba, ia na
bagh izi, egh dagheba inigh dar
ami.
Ia izi wainin dipaba ko oter eborim
inigh, dar iveziba puvati.
Manmagh amizi, ia pura uan dagiaba
isa bizir ian akurvazir puvatiziba
bagha da agefi,
ezi mitiriaba ian aghavira iti?
Ia kuariba arigh deravira nan akam
baragh, ki mikemezi moghin
damu,
egh ia dagher guar aghuir avirir ki
ia ganingiziba izivagham.
Dagher kaba bar isingigh gavgavim
ia daningam.
Ia nan gumazamiziba, ia izi kuariba
arigh na baragh,
ian ikirimirim deragham.
Eghti ki Atrivim Devit ganingizir
apangkuvir arazim ia daningsi,
Akar Dikirizir Gavgavim ia ko a
damighti,
a gavgavigh ikivira ikiam.
Ia oragh, ki Devit gamizi, a gumazir
ekiamin otogha, kantrin
igharazibar gumazamizibagh
ativagha men gari.
Anarira, nan gavgavim isa
gumazamizibar aka.
Ia fomira kantrin igharazir maba, ia
me gifozir puvati, ezi me uaghan
ia gifozir puvati.
Eghti ia men dimam.
Ki Ikiavira Itir God, ian God, ki
Israelian Godin Bar Zuezim,
ki datirighin iziar ekiam isa ia
ganingigha gifa.

Eghti kamaghin, ia kantrin kabar
dimti, me zuamira ivegh ia bagh
izegham.”
“Ikiavira Itir God bar ian boroghira
ikia ia mizua iti.
Kamaghin, ia datirighin a buri izi
an dimiva a baghivira iki.
Eghti gumazamizir arazir ikurabagh
amiba uan arazir ikuraba ategh,
uam adar amusi dagh nighnighan
kogham.
Egh me uamategh Ikiavira Itir God,
en God, a bagh iziti,
a men apangkuvigh men arazir
ikuraba gin amangam.”
Ikiavira Itir God ghaze, “Nan
nighniziba, ia gumazamiziba, ian
nighnizibar min zuir puvati.
Ezi nan araziba, ian arazibar min
itir puvati.
Overiam bar nguazim gisin pin mar
iti moghin,
kamaghira nan araziba ko
nighniziba,
da ian araziba ko nighniziba
bar dagh afira.
E fo, amozim overiamin ikia zaghira,
pura uamategha ghuavanadir
puvati.
A dipam nguazim ganiga egha
daghebagh amima da azenibar
aghuima,
ezi gumaziba da isia dar maba
apava, egha maba opari.
Ezi kamaghira, nan akam uaghan, a
pura uamategh na bagh izeghan
kogham.
Puvati. A, ki mikemezi moghira,
bizibar amuti da otivam.

Eghti ingangarir ki damuasa
ifongeziba, a dar amuti dar
dagheba otivam.”

Kar Godin Akam.

SAM

Ais 12:2-6

Ia akam ikaragh: Ia bar akuegh Ekiam bagh mangi dipar ikirimirir zurara itim anidim inigh.

“Ia oragh! God nan akuragha ua na ini.
Eghti ki nighnizir gavgavim an ikiva egh atiatingan kogham.
Ikiavira Itir God, a Godra, a na gamima, ki gavgavigha iti.
Guizbangira, a nan akurvazir gumazim, ezi ki an ziam fava onger akam gami.”
Mozir dipam, gumazir kuariba piriba, anepa bar akonge.
Ezi kamaghira, God uan gumamazibar akuragh ua me inighti, me bar
akuegham.

Ia akam ikaragh: Ia bar akuegh Ekiam bagh mangi dipar ikirimirir zurara itim anidim inigh.

Dughiar kamin ia kamagh mikimam,
“E Ikiavira Itir God, an iziam dipon egh a minabiva, uarir akurvaghsi an dimam.
Egh ingangarir ekiar an amizibar gun kantribar gumamaziziba bar moghira me
mikimiva,
an iziar ekiamin gun mikim. Ia nguazimin gumamaziziba bar, Ikiavira Itir Godin
ingangarir bar ekiar an amizibar akam baragh.
Kamagh amizi, e a bagh onger akabar amu, an iziam fam.

Ia akam ikaragh: Ia bar akuegh Ekiam bagh mangi dipar ikirimirir zurara itim anidim inigh.

O Saionin mighsiamin itir gumamaziziba, ia fo, Israelian Godin Bar Zuezim, a ian
tongin ikia ingangarir ekiabagh amua iziar bar ekiam iti.
Kamaghin, ia pamten dimiva arang bar akuegh onger akabar amu.”

Ia akam ikaragh: Ia bar akuegh Ekiam bagh mangi dipar ikirimirir zurara itim anidim inigh.

6. RIT

Bar 3:9-15, 32 -4:4

*Akar dapanim: Ia Ekiamin tuavimin gin mangi, egh ia dabirabir aghuim deragh iki
mamaghira ikiam.*

Akar kam, Godin akam inigha izir gumazim Baruk, an osiri.

O Israelia, ia Godin nighnizir
aghuim ko akar gavgaviba, deravira da
baragh. Egh ia fofozir aghuir kamin
mingarim deragh a gifogham. Ia akar
kabar gin mangti, da ian akurvagh
ikirimirir aghuim ia daningti, ia bar
deraghvira ikiam. Israelia, manmagh
amizi ia datirighin apanibar nguazimin
men tongin ikia ghurigha gifa? Ia
mati gumazir aremezibar kuabar min

ikia Godin damazimin zuezir puvati.
Ia manmagh sua Godin damazimin
mizegha ikia iti, mati gumazim
aremegha gifa, egha ian ganganim,
aremezi moghin gari? Ia ti God ataki, a
nighnizir aghuim ko fofozir aghuimin
mingarim. Ia ti Godin tuavimra arua
ghua ia ghueghai, egha ia deraghviram
apiagha mamaghira ikiai. Ia nighnizir
aghuim ko, gavgavim ko, fofozim

ko, nighnizir aghuimin mingarim
gifoghfoghsi, ia da bagh rui. Egh ia
ikirimirir ruarim initi, angazangarim
tuavim ian akaghti, ia dabirabir aghuim
iniam. Gumazitam, Godin nighnizir
aghuim itir danganim, a gifozir puvati.
Egha tinara God uan nighnizir aghuiba
arighizir dipenimin ghu? Gumazi tam
an aven ghuzir puvati. Guizbangira,
Godin fofozim bar pin iti.

God uabira biziba bar dagh fo, ezi
nighnizir aghuiba bar an iti. A uabi
uan fofozimin, nighnizir aghuiba bato.
A nguazir kam iki mamaghira ikiasa
ifonge, egha anan ingari. Egha an asizir
guar aviriba an aven da arighizi, da
an iti. An angazangarimin ingarigha
anemadazi, a danganiba bar adar zui.
Egha angazangarimin deima, an akam
baregha agorogem sara uamategha
a bagha izi A mikovezibar dei, me
zuamiram an dimdiaba ikarvasi. Da uan
danganibara tuivav ikia, Godin men
ingarizimin iziam fa, angazangarim

aniga bar akonge. God, anarira a en
God, ezi godin tam ua itir puvati. Egha
anarira nighnizir aghuimin tuavim
batifi. Egha fofozir aghuim isa uan
ingangarir gumazir a bar ifongezim
Israel ganingi. Ezi dughiar kamin
nighnizir aghuim iza nguazir kamin
gumazamizibar tongin iti. Nighnizir
aghuim, an Arazir God e Ganingizibar
Akinafarimin aven ikia mamaghira iti.
Gumazamizir an suighavira itiba, me
angamra ikivira ikiam. Ezi gumazamizir
anetaghiziba, me ovengam. Israelia,
ia nighnizir aghuimin apigh an
suiragh. Nighnizir aghuir kam, an
angazangarim ia gisira. Kamaghin
ia angazangarir kam bagh mangi. Ia
nighnizir aghuir kam bangin iziar
ekiam isi. A ian bizimra. Eghti ia pura
kantrin igharazibar aningan marki. E
Israelia, God ifongezir araziba e dagh
fogha gifa. Kamaghin e bar akonge.

Kar Godin Akam.

SAM

Sam 19:8-11

Ia akam ikaragh: Ekiam, nin akam, ikirimirir zurara itim e ganidi.

Ikiavira Itir Godin akar gavgavim a bar guizbangira, egha ikirimirir aghuim e
ganidi.

Ikiavira Itir Godin akaba, e nighnizir gavgavim adar ikiam.
Ezi fofoziba puvatizi darazi,
a fofozir aghuim me ganidi.

Ia akam ikaragh: Ekiam, nin akam, ikirimirir zurara itim e ganidi.

Ikiavira Itir Godin akaba, bar deravira en sure gami.

An akar kaba en sure damuti, e uan navir averiabar aven da bagh bar
akuegham.

An akar gavgaviba, angazangarim e ganidi,
egha fofozir bar aghuim en nighnizibagh ariki.

Ia akam ikaragh: Ekiam, nin akam, ikirimirir zurara itim e ganidi.

Ikiavira Itir Godin atiatia an apengan itir arazim,
a deragha bar zuegha, ikia mamaghira iti.

Ikiavira Itir Godin arazir a biziba tuisizim,
a bar guizbangira deragha voroghira zui.

Ia akam ikaragh: Ekiam, nin akam, ikirimirir zurara itim e ganidi.

Godin akam bar deragha gol bar a gafira.

E fo, gumaziba gol tuema, a isigha golin aghuimram oto.

Guizbangira, Godin akam, golin isigha derazir avirim, bar a gafira.

Godin akam bar isingi, egha hani bar a gafira.

A guizbangira, hanin aghuir bar isingizim, bar a gafira.

Ia akam ikaragh: Ekiam, nin akam, ikirimirir zurara itim e ganidi.

7. RIT

Ese 36:16-28

Akar dapanim: Ki dipar zuruzim inigh muziaritam ia gingeegham, egh nighnizir igiam ko navir igiam ia daningam.

Akar kam, Godin akam inigha izir gumazim Esekiel, an osiri.

Egha Ikiavira Itir God uan akam isa na ganiga ghaze, “Gumazibar borim, Israelia uan nguazimin itir dughiamin, me arazir bar mizirizibagh amua, nguazir kam gasighasiki. Me, mati amizim uan iakinir arimariabagh amua nan damazimin mize. Me gumazir avirim misoghezi me ariaghire. Egha me marvir guabar ziaba fe, egha uan nguazim gamizima, a nan damazimin bar mize. Kamaghin amizima, ki bar men aningaghegha, ivezir kuram isa bar me ganingi. Ki men arazir ikurar me amizir kaba tuisigha da ikarvagha me batoghezi, me tintinibar kantrin igharazibar ghue. Me tintinbar ghuezi, kantrin igharazibar gumamaziziba men gara nan iziam gasighasigha ghaze, ‘Kar Ikiavira Itir Godin adarasi. A me gamizi, me an nguazim ategha gifa.’ Ezi ki fo, Israelia ghuezir danganiba bar, kantrin kabar gumaziba nan iziam dipovava a gasighasisi. Bizir kam bagha ki uan iziam bagha osemi.

Kamaghin amizi, ni akar kam Israelia daningigh: Ki Ikiavira Itir God, ian Ekiam, ki kamaghin ia migia ghaze: Ia kantribar gumamazizir igharazibar tongin itima, me ian gara nan iziam dipova a gasighasisi. Bizir gavgavir ki damuamin kaba, ia Israelia, ki ia ginighnighasa dagh amir puvati. Bar puvati. Ki uan ziar ekiam baghavira

nighnigha dar amuasa. Ki uabi Ikiavira Itir God, ian Ekiam, ki ghaze, ia Israelia, ian arazir kurabar ia gumamazizir kabagh amizi, datirighin me nan ziam gasighasisi. Eghti ki kantrin igharazibar gumamaziziba damighti me ganigh fogh suam, ki uabi Ikiavira Itir God, ezi nan araziba da bar moghira zue. Eghti me ziar ekiam na daningam. Bizir ki ia damuamin kam a kamakin, ki kantrin ia datirighin itibar bar ia inigh izi ua ian nguazimra ia arigham. Egh dipar dikiriam inigh ian dapanibagh kavamegh, ian arazir kuraba batueghti ia nan damazimin bar zuegham. Egh ian marvir guaba fer arazir kuraba bagh ki ia rueghti ia zuegham. Egh ki nin navim damighti a ua igiamin otogham. Egh duar igiam ia datigham. Ian naviba faragha dagiabar min gavgafi. Ki datirighin nighnizir kuram batuegh nighnizir igiam isi ian navir averiabar aven, ia daningam. Egh ki uan duam isi ia daningam, eghti a ian navir averiabar ikiam. Egh ia feghti ia deraghvira nan arazir ki ia ganingiziba ko akar gavgavibar gin mangam. Egh ia nguazir ki fomira ian ovavibagh aningizir kamin ikiam. Egh ia nan gumamazizibaram otoghti ki ian Godin ikiam.”

Kar Godin Akam.

SAM (sapos i no gat baptais) Sam

42:3, 5; 43:3-4

Ia akam ikaragh: O God, ki ni buri, mati asizim kuarim an pirizi a dapatam ramasa.

Asizir atiam dipatam amasa ariaghira ivemara daghurir muziaribar uaghiri
moghin,
O God, ki nin boroghin ikiasa bar ifonge.
O God, ni Godin angamra itim, ki ni bagha kuarim bar puvira nan piri, mati
gumazim kuarim an pirizi a dipatam ramasa.
God, dughiar manamra ki bar nin boroghira mangi egh nin ziam fam?

Ia akam ikaragh: O God, ki ni buri, mati asizim kuarim an pirizi a dapatam ramasa.

Ki fomira gumazamizir avirimin faragha ghua me inigha ghua Godin Dipenimin
aven ghu.
Ki me ko zuir dughiamin,
gumazamizir avirir kam Godin ziam fa a minabava pamten tiariba akara onger
akabagh ami.
Ki bizir kabagh nighnigha egha nan navim bar moghira biaghiri.

Ia akam ikaragh: O God, ki ni buri, mati asizim kuarim an pirizi a dapatam ramasa.

Ni uan guizin akam amadagh uan angazangarim akaghti,
aning tuavim nan akagh uam na inigh Saionin mighsiar ni ua bagha inabazimin
min Dipenir ni uabi itimin mangi.

Ia akam ikaragh: O God, ki ni buri, mati asizim kuarim an pirizi a dapatam ramasa.

Ki fomira gumazamizir avirimin faragha ghua me inigha ghua Godin Dipenimin
aven ghu.
Ki me ko zuir dughiamin,
gumazamizir avirir kam Godin ziam fa a minabava pamten tiariba akara onger
akabagh ami.
Ki bizir kabagh nighnigha egha nan navim bar moghira biaghiri.

Ia akam ikaragh: O God, ki ni buri, mati asizim kuarim an pirizi a dapatam ramasa.

(rem (No gat singsing bilong Welkamim Gutnius.)

SAM

Sam 51:12-15, 18-19

Ia akam ikaragh: O God, ni nan navim rueghti a zuegham.

O God, ni nan navir averiam damighti a zuegh ua igiamin otogh.
Eghti nin ifongiar aghuim nan aven iziti ki nirara ganam.
Nin Duam nan aven iti,
ezi ni uabin boroghin na batuegh, na dam uan duam inian marki.

Ia akam ikaragh: O God, ni nan navim rueghti a zuegham.

Ni faraghavira ua na inizi ki ni bagha bar akonge.
Ni datirighin bar akongezir arazir kam na daningigh.
Ki nin akabar gin mangamin ifongiar kam, ni ua na daningigh.

Ki gin gumazir arazir kurabagh amiba, nin akamin me mikimam,
eghti me ni bagh izam.

Ia akam ikaragh: O God, ni nan navim rueghti a zuegham.

Ki fo, ni kamaghin aghua, ki asizim nigh izi ni bagh an ofa damuam.
Ki ofa damusi, asizim misuegh a tuaghti a isigh mighiran ni aghua.
O God, ni kamaghin ifonge, ki ofan min bar uabi abiragh bar nin apengan ikiam.
Gumazir uari abira navibagh iziba, ni akirim ragha me gasir puvati.

Ia akam ikaragh: O God, ni nan navim rueghti a zuegham.

RIT (bihain long singsing Ona)

Ro 6:3-11

Akar dapanim: Krai mozimin dikavigha gifa, kamaghin a uam aremeghan kogham.

Akar kam, akinafarir Pol Romin gumazamiziba baghava an osirizimin aven iti.

Ia ti kamaghin fo, e bar Krai
Iesusin aven ruegha a ko poke. Arazir
kamin e bar an ovevem ko poke. E
ruegha, egha tuavir kamin Kraisin
ovevem ko poke, ezi Afeziam Krai ko
mozimin aven e akaragha e avara. Egha
mati an gavgavir ekiam Krai gamizi
a mozimin ua dikafi, kamaghira, e
uaghan ikirimirir igiar aghuimin ikivira
ikiam.

Ezi, e Krai ko puegha egha mati an
aremezi, moghin areme. Kamaghira,
e a ua dikavizi moghin e a ko puegh
ua dikavigham. E kamaghin fo, en
navir ghurimin araziba, da Krai ko
ter ighuvimin aremegha gifa, ezi en
nivafizimin agoroger arazir kurabar
gavgavim gifa. Kamaghin, e ua arazir
kuramin ingangarir gumazibar ikian
kogham. Guizbangira, gumazitam
aremeghti, arazir kuramin gavgavim
uam a gativaghti, an an apengan ikian

kogham. E ghaze, e Krai ko areme,
egha e nighnizir gavgavim kamaghin
iti, e uaghan a ko ikirimirir aghuir
kamin ikiam.

E kamaghin fo, Krai mozimin ua
dikavigha gifa. Egha uam aremeghan
kogham. Ovevem, a ua gavgavir a
misueghti a uam aremeghamim,
puvati. Egha Krai dughiar vamiram
aremegha ua aremeghan kogham.
Egha ovever arazir kamin, an arazir
kuramin gavgavim gamizi, eghti a
uam a gativsi damuan kogham. Egha
datirighin a ikirimirir aghuarimin
ikia God baghavira iti. Kamaghira,
nighnizir kam ian iki, ia uaghan Krai
ko aremegha egha arazir kuramin
gavgavim uam an apengan itir puvati.
Egha ia Krai Iesus ko porogha God
baghavira ikia ikirimirir aghuimin iti.

Kar Godin Akam.

SAM

Sam 118:1-2, 16-17, 22-23

Ia akam ikaragh: Aleluia, Aleluia, Aleluia.

Ikiavira Itir God a dughiabar zurara en dera, egha a zurara en apangkuvigha mamaghira iti.

Kamaghin amizi e a minamam!

E Israelian gumazamiziba, e kamaghin mikim suam,

“A zurara en apangkuvigha mamaghira iti.”

Ia akam ikaragh: Aleluia, Aleluia, Aleluia.

Ikiavira Itir Godin gavgavimra en akura.

Ikiavira Itir Godin gavgavimra, e uan apaniba dikabira.”

Ki fo, ki aremeghan kogham. Puvati.

Ki angamra iki, egh bizir Ikiavira Itir God amizibagh eghanam.

Ia akam ikaragh: Aleluia, Aleluia, Aleluia.

Kar dipenir akinir ingangarir gumaziba aghuazim,

a datirighin dipenim aterir guarim gava.

Ikiavira Itir God uabi bizir kam gamizima an oto.

Ezi e an garima, a bar dera.

Ia akam ikaragh: Aleluia, Aleluia, Aleluia.

(No gat singsing bilong Welkamim Gutnius)

GUTNIUS

Lu 24:1 -12

Akar dapanim: Ia manmaghsua iza gumazir angamra itim, gumazir ariaghirezibar danganimin a buri?

Ia, Krais Iesusin Akar Aghuir Luk osirizim, a baragh.

Ezi Sanden bar mizaraghara, amiziba borer mughuriar aghuir me arighiziba, inighava dagiar torimin zui.* Egha me gari, me torim avarazir dagiam, me a puegha ghu. Egha me aven ghua Iesusin kuam bagha garava avenge. Egha me kamaghin ganigha nighnizir aviribagh amua tuivighav itima, gumazir pumuning zuamira aningin korotiaba onimarimin min taghtagha men min tughav iti. Ezi amiziba bar atiatigha avigha nguazimin gari, ezi gumazimning kamaghin me migei, “Ia tizim bagha gumazir angamra itim gumazir ovengezibar danganimin a buri? A kagh itir puvati; a ua dikafi! A ia ko Galilin ikia ia mikemezir bizim, ia a ginighnigh, ‘Gumazibar Otarim, me a isi gumazir

arazir kurabagh amibar dafarim datighti, me a isi ter ighuvimin a guragham. Eghti a dughiar mikezimin ua dikavigham.’ ” Ezi a mikemezir Akaba me a dagh iniri.

Egha me mozim ategha uamategha ghua bizir kabar gun Iesusin suren gumazir 11 plan migiava igharaz darazi sara mikeme. Amizir bizir kabar gun Iesusin 11 plan aposelba ko igharaz daraziv kemeziba. Makdalan nguibamin amizim Maria, ko Joana, ko Maria a Jemsin amebam, koma amizir igharazir maba uaghan me ko ikia bizir kabar gun aposelbav gei. Ezi me amizibav gia ghaze, me ti onganighama, egha kamaghin me nighnizir gavgavim men akabar itir puvati. *Egha Pita kamaghin oregha dikavigha ivegha mozimin

ghu. Egha an aviragha, mozimin
gara bizitamin apizir puvatigha inir
ghurghuribara gari da ireghav iti. Egha
a uamategha ghua nighnizir aviribagh

amua ghaze, kar manmaghin amizir
bizim.*

Kar, Kraish Iesusin Akar Aghuim.

